



Minggu, 25 September 2022

Ogen: Josua 2:12-13



"Perbahanen Nandangi Keluarga"



Sekali jadi lit percakapen dua kalak Moria i bas perjumpaan ope benaken PA Moria. Percakapen e topikna kerna jabu ras sangkep geluh. Nina sekalak Moria man temanna si kin bas pengidahna, ia sekalak Moria si erdahin (wanita karir) bas sada perusahaan si mbelin si tentuna waktu melala terpakai guna ngukuri perkembangan perusahaan inganna erdahin.

Moria A : Uga nge banndu carana mbagi waktundu man keluarga bage pe man perusahaan inganndu erdahin? La nge pernah mamre bage pe anak-anak rido man bandu?

Moria B : Payo, benan anak-anak ras Mamre i rumah labo teralokenna kesibukunku erkiteken buen waktuku bas pendahinku. Tapi erlajar aku mbagi waktuku alu makeken tep-tep kesempatan si lit guna ercacak-cakap ras anak-anak bage pe perbulangen dungna mereken pengertin man bana. Umpamana bas jam istirahat entah makan siang, jenari seh i rumah, bicara latih pe kuakap tetap aku mereken waktu man anak-anak ras perbulangen.

Arah percakapen si singkat dua kalak Moria enda, teridah maka selaku nande nandangi anak-anak bage pe selaku ndehara nandangi perbulangen arus tetap si jaga hubungenta sada ras sidebanna. Uga sibukna pe kita i bas pendahinta, peranta selaku nande ras ndehara tetaplal teridah.

Moria banci saja mengembangkan dirina arah pendahin si ilakokenna, Moria banci saja jadi sekalak tokoh si ikagumi i tengah-tengah pendahinna, Moria banci saja jadi sekalak si sukses; tapi sesukses kai pe kita bas geluhta arus tetap si inget jabu ras keluarganta. Bahanlah kesuksesenta njadikan keluarganta, orang tuanta, senina ras turangta bage pe anak-anakta ndatken kemalemen ate ras perasan bangga. Pendahin labo jadi rungga guna nehken kekelengen man jabu, tapi bahanlah jadi dalanta nuduhkan keleng ate ras kehamaten man keluarganta.